

Cu sentimento mixto

Alex Tromp ta bandona parlamento di Aruba

ORANJESTAD – Alex Tromp tabata parlamentario den fraccion di AVP tanto den oposicion como esun na mando. El a sirbi pueblo pa 7 aña y mey y el a haci'e cu orguyo, pero, den su propio palabranan, e ta sali cu un sentimento mixto.

AMISTAD

Segun Alex Tromp, 7 aña y mey ta un trayecto basta largo y ta experiencianan cu a ad-

kiri. Tromp a crea un amistad cu tur e personanan cu el a traha directo y indirecto cu nan, por ehempel e ex colega den oposicion, cu awe ta ex parlamentario. E ta sigui splica cu riba e banda ey tur tin un meta comun, cu ta pa sirbi e interes general di nos pueblo. Cada un cu nan ideologia politico cu nan pensamiento, pero nan tur ta den parlamento pa un meta. Sirbi e

interes general di nos pueblo. E sentimento aki ta algo cu el a carga cu honor. Den bida hopi biaha tin momentonan crucial transcendental cu ta bisa cu ora despues di tempo ta refleha riba nan.

ORGUYO

Pa Tromp, ora cu constelacion nr. 9 huramenta, ta un orguyo di mas grandi cu e por a carga durante e 7 añanan y mey aki. Ta pa e motibo ey e ta gradici

na prome luga su famia, esnan cu durante 2005/2009 a deposita nan confiansa den su persona y por ultimo na lider di e partido AVP, Sr. Mike Eman, di a pone su confiansa den dje y a pidi'e pa e bin forma parti di e partido AVP y na unda cu el a haya e oportunidad di ta parlamentario durante tur e añanan aki.

TRABAO DI UN PARLAMENTARIO

Trabao di un parlamentario ta muestra facil, pero e no ta. Tromp a menciona cu e reto ta grandi. Tur loke hende ta mira ta e reunion, pero e trabao mes ta hopi mas amplio, segun Tromp. Como parlamentario e trabao ta asina amplio, cu no ta solamente e debatenan tin den parlamento, pero pafo tambe e trabao ta sinta. Esey hopi biaha, segun Tromp, falta mas informacion. Tur locual cu ta wordo duna cuenta na pueblo, ta loke ta sosode den e sala.

UN TRABAO SUBLIME

E trabao como parlamentario ta algo sublime, segun Tromp. E ta un reto. E ta sigui splica cu tin ora ta bisa cu no tin un bida priva, pero esey ta e parti caminda e persona ta scoge. Ta politico no ta solamente gana un salario, pero ta pa sirbi e comunidad y mester ta constantemente cla pa nan. Ora cu nan bati na bo porta, ta loke e trabao cu ta haci den Staten, como representante di pueblo.

CLA PA PUEBLO

E consejo di Tromp ta pa no tene miedo. Esaki ta specialmente pa esnan cu un dia kier bira parlamentario. Pa ta un parlamentario mester bringa pe, asumi posicion cu responsabilidad y no bisa cu ta algo imposibel. Simplemente si tin un conviccion cu kier sirbi interes general di pueblo, bay pa e meta. Ora cu bay pe. Tin biaha ta sinti e presion e momento ey, pero a lo largo e ta un funcion cu ta bale la pena. Tin biaha hende ta pensa cu ora cu temporada di vacacion yega, parlamento ta bay cu reces, nan tambe ta baha cu vacacion. Segun Tromp, no ta pasobra cu parlamento ta bay cu reces, esey kiemen nan ta bay cu vacacion tambe. Si un parlamentario mester bay un brindis, of atende cualkier evento publico, e ta topa cu pueblo y ora cu pidi yudansa, e mester ta cla pa por sirbi pueblo den ki circunstancia cu e por ta aden.

VARIOS OPCION

Awor aki Tromp tin tres opcion riba mesa. E ta evaluando y ta kere cu asina cu e ta leu e lo divulga esaki. Posiblemente e por bay traha den sector publico pero, el a haya oferta tambe for di e sector priva.

E tin cu bay haci su evaluacion riba esey. Lider di AVP a pidi'e pa subi un biaha mas riba lista, pero e mes a tuma e decision di no sigui riba lista. □